

Tico Croes ta opina cu

MENTALIDAD COLONIAL DI MEP TA PERHUDICA ARUBA

ORANJESTAD (APA) ---

Pasando pa otro tópico, Sr. Croes a trece dilanti, cu durante último lunanan, por a tende hopi discusion en cuanto e fecha di 1996 cu ta pará den Statuut, riba e asunto di Independencia, riba e derecho di autodeterminacion, riba ken ta Arubiano.

Manera cu A.V.P. a spierta pueblo, partido MEP ta hibando un política sumamente emocional riba e asunto di Independencia. MEP atrobe ta dividiendo nos pueblo, ta papia idioma di odio, rencor y venganza, ta sembra miedo y discordia, y practicá intimidacion contra esnan cu ta expresá un opinion y ta papia di dramamento di sanger. E tendencia y ambiente actual aki na Aruba a tuma un rumbo sumamente peligroso cu lo por tin consecuncianan de-

sastroso pa cada un di nos. Di parti di Partido di Pueblo Arubano A.V.P., durante 3 aña di gobernacion, a papia idioma di paz, amor, harmonia y progreso, pasobra A.V.P. tabata y ta convenci, cu esakinan ta forma e base, e fundeshi pa e bienestar di e pueblo di Aruba. Ta pesey cu den asuntonan asina fundamental manera Independencia, cu lo mishi directamente cu e bida diario di cada un di nos, A.V.P. ta kere, cu solamente a base di un discusion sano, habrí, franco y racional, por yega na un consensus aki na Aruba y asina, tin suficiente poder di conviccion pa nos por confrontá e mundo pafor di nos. Base di e discusion aki mester ta, un estudio profundo riba algun preguntanan fundamental cu ta toca e derecho di autodeterminacion di nos pueblo.

Sr. Croes a remarcá, cu no mas cu algun siman pasá, A.V.P. a presentá un nota, cu yama: "Doño di nos propio destino". E nota aki ta e culminacion di un estudio profundo den seno di A.V.P. Pero e nota aki tambe ta e resultado di e sentimento patriótico grandi y e repudio na e ponencia y mentalidad di MEP, cu ta Hulanda ta dicidi pa nos, kiko nos mester haci. Esaki ta e peor forma di colonialismo. Cu esaki, partido MEP ta sigui demostrá su mentalidad colonial, dor di aceptá, cu ta Hulanda ta determiná y ta dicidi riba nos futuro. MEP ta bolbe aceptá, cu Hulanda ta fiha nos destino. MEP atrobe ta muestra un menosprecio pa nos pueblo y falta di vision y firmeza pa para na defensa di pueblo. Esnan di A.V.P. ta kere otro y ta convenci, cu nos ta independiente, na momento cu nos mes por dicidi riba nos propio futuro y destino. Nos ta independiente, ora cu nos no sucumbi pa ni presion Hulandes, ni pa presion di esnan cu ta sirbi interesnan ajeno. Nos ta independiente, ora nos deshaci di e mentalidad colonial, cu ta Hulanda ta dicidi pa nos. Nos mester caba awor, cu e pensamiento di subordinacion na Hulanda aki. Nos mester para firme y kere den nos mes. Nos mester tin e mentalidad independiente, cu ta nos mes ta dicidi pa nos y riba nos futuro.

Extra . - (13 september 1989)